

TENTAMEN MEDICUM

N° 73.

CIRCA

RABIDEM.

QUOD

IN ALMA FACULTATE MEDICA MONSPELLIENSI PUBLICIS
SUBJECTUM DISPUTATIONIBUS PROPUGNARE CONATUS EST,
IDIBUS QUINTILIBUS MDCCCXXXVI,

JOSEPHUS MODLINSKI,

e Paieczno, *Palat. Calis, in Polonia.*

Societatis Medico-Chirurgicæ Monspeliensis sodalis.

Pro Gradu Medicinæ Doctoris Assequendo.

Est quadam prodire tenus si non datur ultra.

HORAT.



MONSPELII,

Apud XAVERIUM JULLIEN, Typographum.

1836.

Amico Dilectissimo,

ALEXANDRO GRABOWSKI,

A PUERIS STUDIORUM SOCIO DULCISSIMO,

PATRII INFORTUNII CONSORTI,


OPUSCULUM HOC

DEVOTI ANIMI GRATÆQUE VOLUNTATIS

MNEMOSYNON

D. D. C.

MODLINSKI.



TENTAMEN MEDICUM

CIRCA

RABIEM.

Morbus horrendus vesani furoris convulsionumque accessibus, gulæ atque pectoris constrictione spasmodicâ, deglutiendi difficultate summâ, liquidorum ingenti horrore, rerum splendidarum, quin etiam aëris leviter commoti strepituumque singulari formidine, utique phænomenis ipsi peculiaribus nec non præcipuis insignis *Rabies* nuncupari solet. Quod verò inter terribilia hujusce mali symptomata aquæ horror præ ceteris maxime eminet ejusque tanquam genuinum stigma habetur, pro designandâ affectione isthac vox: *Hydrophobia* sæpenumero pro τὴ *Rabies* usurpatur. Multa præterea leguntur in Authoribus præcipue veteribus ejusdem morbi vocabula, quæ omnia, ut præpostera æque ac inutilia symptomatis scilicet alicujus aut phænomeni paulo eminentioris indices ex usu communi jure exciderunt; siquidem certum est, naturâ rei fere penitus latente, ab externis, ut tunc solet, ejus signis deducta nomina eodem vestigiò hærenti studio nihil omnino prodesse,

immo etiam ipsorum diversitate rectum plerumque detorqueri ingenii laborem ambagibusque demorari.

Priusquàm tamen rem aggrediar, notandum esse credo, quod Rabiem inter et Hydrophobiam, ratione originis atque naturæ, recentioris evi Nōsologi nonnullam intercedere differentiam cotendant. Rabiem enim, ajunt, propriè dici eam affectionem, quæ ab insitione virus lyssigeni orti, aut sponte suâ sub quibusdam causarum conditionibus hactenùs ingnotis nata, phænomenorum suprâ memoratorum agmine insignis sit; Hydrophobiam (horror aquæ) autem symptoma esse adventitium, in plerisque morbis acutis obvium, quod sæpenumero neque rabiosam eorum declaret indolem neque adeò majus periculum necessario portendat. Et cum super discernendâ quorumvis hujusce mali casuum naturâ dissonæ plerumque adhuc authorum opinionēs necquiquam componi patiuntur, quippè cum res eadem centum probata exemplis, totidem refelli potest; singulas autem Rabiei species utrumque nomen singulo, ut solet, distinctum epitheto intellectu reddit perfaciles, profiteor me de morbo, qui ab insitione virus robifici vulgo oriatur, pro meo instituto disserentem, hâc illâve voce promiscue uti nihil pensi habiturum. Ceterum, si consideremus, multarum observationum experimentorumque seriem attento animo perpendentes, in pluribus affectibus, præcipuè nervosis eandem mali naturam, pro causarum, individuæ conditionis, idiosyncrasiae aliarumque rerum varias posse præferre facies variamque induere formam; quum morbi contagiosi, sive epidemice sevirè soliti, sive qui sporadice grassantur, non solum per luis contagium, sed et sponte aliquandò nasci aut alias comitari affectiones deprehendantur, neque ideò generis sui amittant indolem; cùm denique de morborum naturâ, non ex eorum causis, quas plerumque mens humana nullatenùs assequi potest, sed è signis eisdem propriis, symptomatibus atque organicâ lesione opinetur; nihil est, quin et omnes Rabiei casus, quemvis habeant originem et speciem, dummodò propriis declarentur signis, ad ejusdem naturæ referantur principium.

Et quidem Hydrophobia (1), phænomenon rabicum, (quod cu-
potûs ciborumque aversione in quibusdam morbis gravibus obviâ
neque quidquam in se rabidi denotante confundi non debet); in
pluribus affectibus cum sporadicis tum epidemicis occurrit, nihilque
aliud, meo sane iudicio, indicare videtur, nisi quod systema ner-
veum, aut saltem certa ejus portio eodem prorsûs modo primitivi
morbi vehementiâ afficiatur, ut à viru lyssico, sano homini commu-
nicato solet; et licet tum symptomata rabiosa paulò lenius sevant,
nihilominus tamen Rabiem principi morbo implicitam commons-
trant et contagiosam; quippè aut vires ægrotantis primi mali inten-
sitate jam exhaustæ omnia phenomena rabiosa ad liquidum prodere
impares sunt, aut illa primogeni affectûs symptomatibus domantur.
Hoc igitur in casu, quoniam liquidorum horror bibendique impo-
tentia maximè est perspicua, Rabei speciem *Hydrophobiam* dici
præstat. Hæc apparere visa est in morbis inflammatoriis, in iis,
qui ex vehementi functionis cutaneæ pulmonumque perturbatione
plerumque oriuntur; in rheumatismis violentis (*Marcel, Donat, Kähler*);
in febribus nervosis asthenicis, malignis (*Selig, Salmuth, etc*);
in febribus exanthematicis (*Gesner, Hoffmann, Hufeland, Brogiani*);
in cerebri lesionibus, apoplexiâ, (*Trécour, Goetz, Juncker*); in epilepsiâ,
hysteriâ etc. etc. Nonnunquam cum morbis epidemicis incedit;
talem observavit *Rougemont* Londini anno 1758—59; *Sarcome* in suâ
historiâ morborum Neapoli grassatarum pro certo affirmat vidisse se,
plus vice simplici, hydrophobiam febris epidemicæ, quam describit,
adjungi. In collectaneis Vratilavien-sibus legimus hydrophobiam æstate
ardentissimâ sub specie febris epidemicæ grassatam et constanter exitialem.
Multas ejusmodi observationes videre est in scriptis Doctoris Selig.
In febribus intermittentibus etiam symptomata hydrophobica nonnunquam
ingruere sunt visa; illustris Alibert (1) ejus duo exempla refert, alterum a
Dumas in Nosocomio Lugdunensi, alterum a Bullon notata.

(1) Quamvis *hydrophobia* aquæ tantummodo horrorem sonet, tamen et deglutiendi diffi-
cultas eâdem est comprehendenda; hæc enim illam excitare videtur, immo etiam absente
liquidi horrore διασπασι urget.

(2) Traité des fièvres intermittentes pernicieuses.

Rabies idiopathica a morsu hominis aut animalis cujusdam sani, sed irâ excandescentis aut aliquâ affectione animi afflictâ oriri potest, ut Pouteau, Morgani, Mauget, Frank animadverterunt. Subitus pavor eum quoque efficere valet; pluribus observationibus Autorum et maxime Laudati St-Martin hæc opinio innititur. Secundum Andry affectio hæc sponte evolvitur, æstu fervido itinerisque non intermisso labore occasionem præbente. Hinc inferendum est, quod inter venenum lyssicum et animi affectionem præcipue vehementiorem, nulla prorsus intercedat differentia; nam virus animantium, quod ab eorum irâ vel insaniâ vel denique morbo generatur, eadem ipsa prodere potest phænomena, quæ in Rabie communicatâ cernuntur, neque sine noxâ transmittitur.

His præmissis ad Rabiem simplicem, ab omni scilicet alia affectione liberam, eam denique, quæ ab animali rabido communicari solet, redire hortatur instituti operis ratio. Attamen operæ prætium est de causis, quæ potissimum in animalibus, præcipue ad genus *felis* et *canis* pertinentibus, Rabiem ingenerare valent, paucis eloqui. Itaque transpirationis cutaneæ defectus, nimius æstus aut immodicum frigus, alimentorum e regno animali provenientium ac corruptorum putraminumque esus, inedia, aquæ penuria malum hoc excitare posse putantur. Illustris Boërhaavius a vermibus in ductu choledochi, renibus, intestinis, naribus et cerebro hærentibus Rabiem nasci annotavit. Præterea, venus negata, affectus animi vehementes, pavor derepente incussus, immodica ira, in animalibus præsertim, quæ et calidioris naturæ sunt et ad iracundiam prona. Utut omnes ejusmodi causæ Rubiei originem dare existimantur, tamen eorum efficientiam ambiguam esse quotidiana fere docet experientia, nisi concursus quemdam earum certamque systematicam nervei aut totius œconomiae animalis ad concipiendum malum aptitudinem admittamus; quam rem ego, quia et nimis obscura est et parum ad mei instituti rationem refert, in medio relinquo.

De Rubiei Natura. Principium subtilissimum et miasmaticum aut morborum contagiosorum malefici genii ad modum penetrantissimæ indolis, in regno animali et maxime in generibus supra memoratis, sub

quibusdam corporis simulac causarum conditionibus sese evolvens, contagiosum, quod virus rabifici nomine designari placuit, omnino nobis celatur, et nonnisi effectibus suis, iisdem semper, suam probat existentiam. Atque mirum est, aliquando ejusmodi virus negari, Rabiemque affectionem putari merè nervosam; proinde quasi constantiam phænomenorum Rabei propriorum nevrosi alicui sui generis, ob eamque rem prorsus ignotæ attribuere satius esset, quam causæ immediatæ eandem ipsam nervosin producenti. Quod si a terrore, propter vulnus ab animali hydrophobo illatum, causam mali repetamus, ut quidam medici volunt, aut ab irritatione locali nervorum partis lesæ, secundum alios, ipsâ re coarctamur erroris, multa exempla ab observatoribus fide dignissimis relata, immo fere nemini ignota cernentes, quod homines a cane rabie correpto mordicis appetiti, omnis periculi securi, summâ tranquillitate animi ad primam usque mali invadentis periodum fuissent, etiam casus sui obliti de diversâ affectionis suæ causâ conquerebantur. Infantibus, utpote intellectu eorum nondum evoluto, omni periculi sensu carentibus morsum rabidum aut contactum humoris in animali hydrophobo secreti cum illorum partibus virus rabiem producturum insevisse experientia docet. Si a nervorum partis lesæ irritatione simplici hydrophobiam oriri posse consideremus, tunc dentibus animalis vix summam cutem stringentibus, aut salivâ venenatâ qualitate imbutâ solam partis superficiem tangente, vulneris atque adeò irritationis absentia malo originem dare par non esset; atqui rabiem, in tali re, non solum incidere, sed etiam magis exitiosum esse constat. Accedit, quod vulnus nudæ parti factum inter et quod per vestes aut densos pilos eam contegentes infligitur nihil interesse deberet, attamen illud longe perniciosius esse solet. Postremò vulnera, sive grandia et alta, sive levia a cane sano illata, a rabie non excipi nemo ignorat. Patet ergo hinc clarissime, quod neque vulneris natura, neque irritatio nervorum per se ipsa rabiem producere valeat, et quod virus quoddam existere debeat, cui morbi hujusce generandi indoles inest.

Quomodo agit virus sano corpori insinuatum? Sunt qui putent

quoniam inspecta rabientium cadavera multa persæpe inflammationis vestigia ostenderunt, veneni rabifici qualitatem esse summe irritantem, hoc primum systema nervorum infici, quod proxime ad convulsiones sit referendum; deinde hinc vitium nasci humoribus vice suâ solidis labem inferentibus, quod inflammationis gangrænosæ quasi proximum sit: Boërhaave, Sauvages, Hoffmann, Cooper, Wanswieten etc., hanc profitebantur opinionem, et Rabiem, ut morbum summe inflammatorium tractari oportere putabant. Doctori Mead fluidum nerveum imprimis a quovis veneno animali infici videtur, idque tantâ celeritate quibusdam in casibus fieri solere, ut intra aliquot minuta mors adveniat. Ut vero enigmaticam virus lyssici in corpore moram explicet, pulpam cerebri, ait, ab eo aliquatenus alterari debere antequam malum certis signis elucescat. Nugent in opere quod anno 1753 publici juris fecit, primos, ait, veneni cujuslibet effectus continuo per systematis nervei affectiones manifestari, quod omnia phænomena, quæ insitionem virus excipiant, spasmodica sunt; idque ratiocinatione, quod punctio aut dileceratio tendinis, variolarum inoculatio, viperarum morsus etc. similibus viam patefaciant eventibus, probari posse autumat. Quocumque autem est symptomatum a variis natorum venenis diversitas, et sanguinis et ullorum œconomiae animalis humorum (salivâ tamen exceptâ) infectionem negat; in solidis eam tantum virulentiae propagatoribus ejusque præcipuâ sede, hæere putat. Itaque hanc opinionem expendit: virus plagæ insinuatam non absorbetur, sed fibris, quas penetravit, inhæret easque exitat, spasmos locales, occultos movet, dehinc sensim et sine sensu vicinos invadit tissus, latius longiusque diffunditur, motus spaticos concitans; quapropter tissus sic continuo motu irritati intumescere, functiones organicæ perturbari, intercludi, et malum eodem semper tenore magis magisque desævire, sursum prorepere, donec ad organon aliquod ad vitam individualement maxime necessarium progressum, totam œconomiam concutiat suique terribilia prodat indicia. Mederer medicus celeberrimus Rabiem in mutatione muci, sive ejus a veneno elaborato infectione consistere opinatur. Enaux et

Chaussier sic **Rabies** definitur. *La Rage est une espèce de fièvre nerveuse, qui attaque le principe vital et produit dans toutes les humeurs et particulièrement dans la salive une dépravation telle, que la morsure d'un animal affecté de cette maladie la communique à un autre. Le Roux, Bouteille, Poutau, Villermet et Trollier, ad eandem fere accedunt sententiam.*

Quod ad præcipuam sedem mali attinet, alii in cerebro, ut **Andry**, **Marshall**; alii in medullâ spinali, ut **Hufeland**, **Reid** eam esse existimant. Pulmones, aspera arteria, glandulæ salivariæ etc., ab nonnullis authoribus pro sede præcipuâ Rabiei habentur. **Benj. Rush** et **Aromatarius** **Hydrophobiam** peculiarem anginæ speciem esse contendebant, eorumque sententiæ etiam **Zvingeri** observatio videtur favere, qui interstitia membranosa cartilagineorum asperæ arteriæ circulatorum vidit intensissime rubentia, fauces valde inflammatas; sed complurimis observationibus et dissectione cadaverum accuratiori eorum infirmatur opinio. Itaque **Meadius** in puero quodam hydrophobo dissectionem habuit; gulâ, cerebro, thorace et ventriculo examinatis nihil usquam præter solitum invenit. Multa exinde aperta cadavera raro inflammationis asperæ arteriæ aut faucium vestigia ostendisse constat. Coeterum, quis unquam ab Anginosi salivâ in cutem assidentium deciduâ anginam vidit communicatam, nedum ejus fomitem, si forte communicatus esset, diù certâ in parte latentem atque ex hâc demum se exserentem? Neque minus a ratione videtur aversum, quod quidam authores rabiem, vide licet propter salivæ venenatam qualitatem, inter glandularum salivariarum affectiones reponendam censuerint; siquidem dissectio cadaverum hydrophoborum diligens organorum istorum qualitates físicas, ut quæ solæ accuratius æstimari patiuntur, easdem, quæ in statu normali esse soleant, ostendit, nec quidquam in iis noxæ unquam repertum est (**Trollier** et **Villermé**). Prætereà humorem spumeum quem æger in ore maxime incommodam respuere conatur, non salivam esse, sed mucum fluidum, per membranam mucosam viarum aëriarum abunde secretum, aëri in respirationis conatu commixtum et spumantem, quidam authores et in his, **Faure** docuerunt. Nec

mirum, pulmones constantissime sanguinis plenos, aut omnino in vesiculas effusi inveniri; cum omni systemate nerveo vehementissime irritato, nervorum pars ad pulmonis functionem naturalem destinata, eodem malo laborans, solitam sibi perdat energiam, ob eamque rem organi hujus actionem imminuat, debilitet, quod stagnando sanguini idoneum est; eo accedit, quod humoribus depravatis, parenchyma pulmonum æque ac membrana mucosa bronchiorum irritentur inflammanturque; hinc anxietas summâ, opressio præcordiorum, dolor urens, dyspnæa etc.

Igitur principum authorum opinionibus collatis, nostrarumque, quas accuratâ cadaverum hydrophoborum dissectio maximè obvias esse ostendit, consideratâ naturâ, Rabiem in affectione systematis nervei consistere non dubito; utpote, cum phænomena morbidâ, quibus horret, non ab aliâ origine emaneant, at quod nervi non à contactu, ut ajunt, sanguinis infecti, sed directe à viru cum fluido nerveo ad cerebrum prorepente, aut imaginationis effectû, aut aliâ quâvis causâ, vehementer corripitur, concedere nequeo. Constat enim, præter quod exempla exhibeantur et inter alia: canem, qui sanguinem e venâ hydrophobi cujusdam missum lambisset, paulo post rabie correptum periisse; morbum hunc non statim ut plaga inferatur, se evolvere; quod fieri deberet, viru fluidum nerveum illico contaminante; quippe causarum in isthoc delicatissimum tenerrimumque corporis systema actio immediata multo celerius, quam in reliquis, malum pariunt; in rabie vero tringinta aut quadraginta dies plerumque elabuntur, antequam affectionis prorumpant symptomata. Et quidem virus, meo sanè judicio, per vulnus aut membranam mucosam (hâc enim viâ facilius excipitur, cutis autem, propter epidermidis hebetudinem ab eo penetrari non videtur) cum tissibus quibusvis commissum non absorbetur, sed in organo, ob suam scilicet cruditatem indolemque ad perturbandam ejus functionem nondum idoneam, hæret innocuum neque diffunditur. Quare, si vulneris excidendi aut probe inturendi salutare adest consilium, viru sublato, funestum prævertitur malum. At cum hæc cura non adhibetur aut inconsideratè differtur, ingens periculum

imminet. Et enim vulnus, quod à communi morsu nullatenus distat, actutum sanescit; nisi parte graviter dilaniatâ, sanatio difficilis sit; cicatrix obducitur nihilque doloris neque incommodi superesse videtur. At virus sub cicatrice inclusam cum humorum localium elementis commixtum paulatim fervere, elaborari, sensim sensimque maturescere adeò, ut intra aliquot dies venenum evadat perniciosum. Vasa absorbentia vicinique tissues hoc fermento perciti eriguntur, eorumque actio organica plus æquo intensa insolitos ciet motus, et virus novum pestiferâ imbutum qualitate cum humorum agmine trahit et in sanguinem devehit. Mox natura pro vitæ salute ordinisque naturalis conservatione maxime sollicita atque omnium, quæ ejus tenorem infringere minitentur, impatiens, lethiferum hunc hostem expellere molitur. Itaque vesicularum ad frenulum linguae, sive potius, ad orificia ductuum salivariorum glandulae submaxillaris fere constans eruptio, et pustulae in cicatrice ipsâ apparentes, salutaris ejusdem naturæ conaminis in eliminandis corporibus extraneis, sive casu intra organorum compagem delapsis, sive in æconomia ipsâ, sub certis conditionibus morboris, evolutis, solidis aut liquidis, effectus est. Pustulae ejusmodi quarto aut nono ut plurimum, die postquam plaga esset inflicta, nonnunquam etiam vigesimo aut tardius, pro veneni videlicet quantitate atque ægri idiosyncrasiâ, apparent humoris pellucidi plenæ, quod ipsum virus liquidum est, elaboratum, principio lyssico et parte humoris naturalis compositum, tanquam fermentum aliquod, cujus destruendi nisi festina adhibeatur opera, sanguini venosæ et lymphæ primò, deindè mediantibus his, toti œconomiae animali labem inferre valet. Quod si accidit, sanguis venenatâ indole, irritanti videlicet, præditus atque in naturâ suâ vitiatum omnesque penetrans tissues, organa tam vitæ animalis quàm vegetativæ et imprimis totum systema nervorum in concitatissimum abripit motum; hinc sævæ convulsionum actionisque organicæ perturbatio perniciosa; hinc functionum vitalium labor sensuumque tumultus inhumanis. Spasmodum vehementiam prolongatam interdum excipit inflammatio, quæ hic atque illic nonnumquam deprehenditur. Actio assimilatrix

sive nutritio proprie dicta et absorptio cum ob sanguinis depravationem, tum ob nervorum eidem præsidentium, resolutionem, quippe eodem malo ac magnus sympaticus, cerebrum nervique ab his orti urgentur, sensim sensimque labat, cessat, sistit; secretionem universali adhuc partes suas fungente, donec et hâc demum prostratâ, vires frangantur vitales et mors amoliatur miserum.

Symptomata. Signa rabiosa in cane hydrophobo sunt : canis Rabie imminente per aliquot dies fit morosus, tristis, cibos fastidit, omne lumen odit, solitudinem et tenebras quærit, dominum quidem vocantem adhuc accedit eique blanditur, sed ignotis obmurmurat, non latrat. Mox difficultas deglutiendi apparet, aquæ aut alius cujusvis liquoris aspectu terreri videtur; inquietus ædes fugit, rectâ procurrit, vix mordens viâ cedentes; post diem unum alterumve domum herilem magis anxius revisit, ipsique domino obmurmurat. Post, domum fugit, titubansque incedit, haud omnes mordens occurrentes; caudam remulcet; oculi ejus aut profundius in orbitis latent, aut proëminent, rubent scintillantque; vultus ejus torvus est, minax, furiosus; pili hirti, in collo et dorso vel maxime erecti; gula spumentis salivæ plena. Canes sani ipsum fugiunt ejulantes, sive instinctu, sive alia ratione de periculo moniti, aut morderi patiuntur non repugnantes. Caput et aures demissæ, lingua propendet, respiratio anhelata, vox rauca; interdum aquæ aspectu aut corporum splendorum convulsiones horrendæ excitantur. Post 5-6 horas furoris animal viribus exhaustus procumbit, neque resurgit, nisi corporibus, quæ ejus excitent furorem, præsentibus. Denique moritur in atrocibus convulsionibus, aut, quod sæpius fieri solet, longe ante hoc tempus obtruncatur.

Symptom. in homine. Vulnus recenter inflictum ab alio quocumque nullatenus differt, et sæpe cito clauditur, qu'n valetudo per tres aut quatuor septimanas turbetur. At circiter nonam diem, vel ocius vel serius, pro quantitate videlicet veneni et dispositione ægrotantis, vesiculæ sub linguâ evolvuntur, lympham pellucidam, subrufam continentes, quæ post aliquot dies disparent. Tunc locus lesus sive jam clausus sive adhuc apertus calescit, prurit, ardet, dolo-

remque rheumatismo similem per totam partem sursum, puta: a digito ad metacarpum, inde ad carpum, antibrachium, brachium etc. diffundit; quin tamen tumeant glandulæ lymphaticæ, aut partes dolore affectæ. Paulo post, vulnus sanatum livet, nigricat, turget et sæpe aperitur; habitum deteriorem induit apertum; inflammatione corripitur, margines ejus retorquentur purulentâ et fetidâ sanie manant. Nonnunquam symptomatibus Hydrophobiæ prorumpentibus, nihil eorum in parte commorsâ apparere constat. Stadium hoc a vulnere accepto ad prima erumpentis mali indicia, nempe 20-40 dierum vulgo, *Incubationis* nomine ab authoribus designatur.

Interea symptomata irritationis cerebri, ventriculi nuncia consurgunt, dolor capilis gravativus, temporum compressio, somnus sæpe lymphaticis somniis tumultuosus, sæpius insomnia continua. Apud nonnullos hydrophobos intellectus functiones erigantur, memoria tenacior fit, conceptionum facilitas major, colloquium concitacius, pulsus paulo frequentior quam in statu normali, organa sensuum externorum vehementer excitantur; hinc rerum splendidarum, luminis strepitusque impatientia summa. Alii, contra, anxii sunt, taciturni, iracundi, animo fracto ac demisso, corpore debilitato; oculi eorum fulgore micant, post truculenti fiunt; vultus terroris imaginem exhibet. Interdum apud utrosque ventriculi ac intestinorum affectionis phænomena varia, ut: cibi fastidium, nausea, vomitus, constipatio aut diarrhæa; pulsus naturali vividior; sitis accenditur. Hoc est *primum* Rabiæ stadium.

His phænomenis prægressis, mox symptomata hydrophobiæ peculiariora in scenam prodeunt. Liquidorum conspectu, aëris commotione aut luminis fulgore subnimio miseri subito inhorrescunt. Neque minus ægri sitim, quâ fere enecari videntur, restinguere cupiunt; at miserum! vix primoribus labris humorem exoptatum attingunt, cum violento horrore, spastico motu fatale rejiciunt poculum; et si quandò aliquid liquidi haurire detur, ob summam pharyngis atque æsophagi constrictionem, idem respuere coguntur. Tunc anxietas exoritur immanis; expulsiore ore licet sicco frequentis-

simā ; quod ne salivam quidem et mucum spumosum deglutire concedatur. Subindè ægri clamorem edunt acutum, canino ejulatu analogum; ingentique quassantur horrore. Suspensos vel minimum murmur offendit; si januam vel patentem ocluseris, vel clausam aperueris, idem eos invadit horror ac si tota domus penibus concussa rueret. Si quandò miseri hydrophobi aliquam a torminibus remissionem nacti, labentes sitim sedare possint hiantque, post aliquot horas, omnia phœnomena rabida rursus consurgunt multo sæviora spasmodumque violentia major. *Studium secundum.*

Deniquè malum magis magisque intenditur, pulsus acceleratur, vultus rubet, oculi nitent sub intermissione. In paroxysmis verò, pulsus, exilis, depressus, contractus fit; omnes ferè corporis partes atrociter convelluntur, oculorum obtutus vagus, minax, defixus aut agitato; spuma circà os colligitur; vultus furrorem simulac ingentem terrorem pingit, vel luctuosus lamentum et desperationem prætendit. Dùm tragica hæc scena peragitur, delirium ingruit cum maximè terrificis rabiei et furoris symptomatibus; dentium stridor horrendus, sæpe conspuendi mordendique conamen. Interdum dolor ad spinam dorsi existit, et priapismus modo, cum modo sine veneris desiderio. Sunt, qui accessione venturà, ut recedant neque curas ultra protendant, adstantes rogant et dehortantur; atque post paroxysmum, pro injurià fors illatà veniam dolentes petunt. Ad postremum, pulsus fit debilis, inordinatus, intermittens, insensibilis; respiratio adeò difficilis ut æger suffocatum iri videatur; anxietas ad summum evecta, vox fere extinguatur, viribusque prostratis, sudor frigidus ac viscosus per totum corpus crumpit, extremitates frigent, et miser aut diris excruciatu torminibus aut per syncopem diem obit supremum.

Prognosis. Rabies raro diutius quinque diebus perdurat; sæpe intra biduum absumit ægrum; immo, viginti quatuor horas malo hocce correptos periisse memorant. Quod ad prognosin attinet, plurium rerum et præcipue: temperamentis, ætatis, sexus, idiosyncrasie, loci plagâ affecti, ejusque magnitudinis, temporis à primo

casu ad remedium usum elapsi, etc., ratio est habenda. Itaque constitutio debilis, temperamentum nervosum et lymphaticum hydrophobiæ evolvendæ vel maxime favere experientia docet. Metus, omniaque animi pathemata eruptionem ejus maturant. Quo magis pars lesa vasis absorbentibus et ramusculis nervosis abundat, eò periculum est majus. Denique morsus à cane rabido factus eò perniciosior est, quo longior curæ mora affertur.

Autopsia. Arteriæ omnes sanguine nec in aëre libero concrecente admodum distentæ; nonnunquam vasa hæc rupta sunt reperta, sanguisque ejusdem semper adspectus, effusus; contrà, venæ omnes fere inanes, aut aliquantulum sanguinis spumosi continentes, (Andry, Mead.) Dura meninx crassa, rubens, sicca magis quam humida et instar chartæ pergamenæ crepitans. Membrana hæc sæpenumero in sinibus suis concretiones tenues, polyposæ naturæ sed facile dissolvendas habuit. Vasa omnia cerebri sanguinis adeo plena ut plexus choroides nigricarent. Pulmones nigro sanguine farti, quorum inter lobos plerumque bullæ aëreæ sunt deprehensæ, (Morgani, Mead, Sauvages). Stomachus glareâ viridi, subnigrâ inundatus, membranæque ejus lividis ac gangrænoë distinctæ maculis (Darluc). Intestina omnia persæpe coarctata, sicca aut gangrænosa. Jecur pallidum, turgidum, solito grandius sanguineque fluido fartum; vesicula bilis atræ plena, (Andry Darluc). Utut hæc sunt, tamen inflammationis summæ vestigia sunt maxime obvia: membranæ encephalicæ ac medullares rubent; membrana mucosa pharyngis intensissime inflammata et muco viscido inducta; eadem viarum aëriarum ab arteriâ asperâ ad ultimos usque bronchiorum ramusculos æque ac pulmonum parenchyma inflammata mucoque spumoso illita; denique membrana gastro-intestinalis phlegmasiæ vestigia exhibet.

Cura. Primum medici, ad hominem ab animali rabido plagâ affectum, accersiti negotium est, ut sine ullâ morâ vulnus excidat, aut cauterio aliquo probe exurat, aut deniquè, si id ratio posceret, partem lesam amputet. Vulneris exitio aut partis commorsæ amputatio, quam Samuel Cooper, ut efficacissimum remedium commen-

dat, haud semper convenit, et nisi in partibus, quæ, sicut illustris Delpech notavit, profundius latiusque dilaniatæ et levioris in æconomia essent momenti, ut digitus, nasi extremitas, aurium conchæ pars aliqua, etiam manus, pes, eo remedio uti debet auctor. Cum propter rationem hanc amputatio aut excisio fieri nequeat aut non debeat, cauteriis vulnus aggrediendum est. Antequam ferrum candens, aut aliud quoddam cauterium admoveatur, vulnus diligenter aquâ simplici, aut quod melius est, saponatâ, aceto, dissolutione potassæ, chlorureti calcis, etc., abluendum est; quo virus in superficie vulneris adhuc hærens lotionis repetitâ vice aliquâ saltem in parte auferatur; ob eam quoque rationem sanguinis fluxum sistere festinandum non est. Quod si vulnus inæquale, profundius fuerit sinusve habuerit, dilatandum incidendumque est, ut omnia puncta, ad quæ hære venenum possit, cum lotionibus tum aliis remediis applicandis pateant. Sunt, qui parti vulneratæ cucurbitulam admovendam censent, nisi veneni ablutio absque sanguinis largiori fluxu obtineri possit. Sed hæc omnia, quamquam multum prodesse possint, tamen a rabie futurâ non liberant, et in urgente destruendi virus necessitate multum persæpe consumunt temporis.

Itaque vulnus rite mundatum, hæmorrhagiâ absente, probe inurendum est caustico, aut actuali, ferro scilicet candenti, aut potenciali, nempe: acidis mineralibus concentratis, lapide caustico, deuto-chlorureto antimonii, nitrato argenti fuso, deutoxido mercurii, ammonio liquido etc. Ferrum candens, quo Veteres semper in iisdem utebantur vulneribus, parcioris, nostris temporibus, est usus; propterea quod combustio ejus naturæ partibus tendinosis applicari nequeat et vulneribus profundioribus, sinuosis et multis vasorum nervorumque gradiuseulorum ramos exhibentibus ferrum adigi periculum esset; præterea et illud incommodi habeat, quod et ægrum perterrefaciat, quod sedulo fugiendum est, et crustem inducit tarde lapsuram, quâ ulterior veneni fors latentis destructio impeditur.

Cauterium potentiale ægrotis minus formidolosum majoremque

mali securitatem promittens, quam quæ per ignem obtinetur, nostrâ ætate vulgo in usu est. Deuto-chloruretum antimonii, sive Butyrum antimonii ex omnibus cauteriis, superius enumeratis, primas obtinuit; tum quia perfacile applicatur et sinus vulneris penetrat exurens quæ attingit: tum quia crustam inducit cito cadentem; unde obtinetur, ut iterari applicatio citius possit. Vulneri rite abluto ac siccato imponitur linamentum butyro antimonii probe imbutum; partes vicinæ sanæ a butyri actione linamentis siccis protegi debent. Tertiâ vel quartâ horâ post, crusta reperitur juste formata. Nitræ argenti fusus et acida supra memorata eodem modo adhibentur. Ceterum, quodcumque eligitur cauterium, quæcumque cauterisandi instituitur methodus, rei præcipuum est, ut omnes vulneris partes, omnia etiam puncta, quibus insedit virus, destruantur; atque in tanti mali periculo longe præstat, ut ajunt, paulò nimium comburere quàm parum.

Crustâ lapsâ, si ulcus infasti esset aspectus atque abunde suppuraturum non videretur, auctores secutus, vesicans applicarem, aut corporibus epispasticis, ut: pulvere cantharidarum, cortice gnidii, sinapi, etc., aspergerem, quò irritatio localis augeatur et suppuratio fiat copiosa, quam intra justos fines per 40-50 dies alerem. Hic quoque, suppuratione languente, cucurbitulæ locus dari potest. Si autem forte tardius vocetur medicus, ubi vulnus jam sanatum sit, nihilominus tamen et sine morâ rumpendum est, eodemque modo ac supra agendum. Præterea, sive vulnere jam adusto ac suppurante, cum nondum satis certus est medicus omne se virus sustulisse, sive tarde accersitus, vulnus incidit sanatum, continuo sub linguam ægroti diligentissime inspiciat atque evolutionem vesicularum observet; quæ si sint, statim cauterio adhibito destruantur, orisque cavum dissolutione salis, aut decocto genistæ, ut suadet Marochetti, sæpe colluatur. Neque observatio doctorum Semella et Schæberd, qui affectionem hanc per chlorinam efficaciter se tractasse prodiderunt, rationi nostræ repugnat. Et quidem substantiæ istius excitantis miasmatumque neutralisandorum virtute præditæ, et forsan virus cujusvis domandi facultate, solutio

aquosa extrinsecus pro vulnere fovendo; eadem solutio ex dr. 2, saccharo edulcorata, quotidie intus data, ut citati auctores commendant, absque dubio ad mali vim frangendam strenus opitulari debet.

Simulat prima erumpentis hydrophobiæ signa prodeant, remedia quæcunque nihil prodesse putantur. Ut contra morbos vix non sanabiles alios, ita contra Rabiem plurima celebrantur medicamenta, vel inter plebem nota. Quod factum fuisse videtur propterea, quod qui iisdem sanati putabantur, infecti non essent; nam certe non omnes ab eodem cane demorsi rabie corripiuntur, sive quod demorsus dispositionem non habuerit, sive ob marsum per vestes adactum saliva ad vulnus non penetraverit, sive vero applicatum sanguinis, ope sit ablutum.

In ingenti remediorum numero hæc præcipua dantur: opium, moschus, camphora, assa foetida, ammonium, mercurius, radix plantaginis aquaticæ, scutellaria laterifolia, meloë majalis; præcipitatio inopinata in flumen aut mare, aspersiones aquæ frigidæ; emetica, purgantia, sanguinis emissio etc etc. Antispasmodica contra causæ effectum nempe, symptomatum nerveorum sævitiam qui lquam prodesse puto; quod vero ad malum eradicandum attinet, ea nihil valere. Neque antidotis a pluribus auctoribus laudatis nimis confidendum, quorum efficaciam fides per experimentorum seriem infracta est.

Consideratâ nostræ super naturâ et sede mali hujusce rationationis conclusione, computatisque felicioribus quibusdam multarum curandæ Rabiei viarum eventibus, hæc mihi eradicandi mali instituenda videtur methodus: Indicatio est, ut causæ primæ actio compescatur, suffocetur; ut effectus ejus, symptomatum scilicet atrocitas mitigetur, tollatur; denique ut vires ægri labentes sensim sensimque corroborentur. Itaque causâ præcipuè in fluidis hærente venesectioni incumbendum, sanguisque largiter et repetitâ vice emittendus est, quo veneni quantitas simul cum sanguine diminuatur atque ægro, sicut observatio docuit, liquidorum deglutiendorum facultas restituatur. Interea, ptisanæ

calefacientes, diaphoreticæ copiosè administrandæ; interdum certâ dosi antispasmodici cujusdam remedii adjectâ, pro symptomatum intensitate comprimendâ; idque eâ ratione, ut et sanguis residuus, vitiatæ naturæ extendatur, diluaturque, simulque actio ejus lethifera in systemâ nerveum frangatur, atque eundem salutarem habeant effectum, quem injectio aquæ simplicis in venas hydrophoborum aliquoties obtinuisse refert illustris Magendie. Interdum purgantia et analeptico-tonica alternis vicibus danda, quibus æque ac per sudorifica, humores depravati excernantur et actio organica malo communi oppressa resuscitetur.

Insuper, paroximis imminentibus, hirudines pone aures, ad partem colli anteriorem, sub claviculas admovendæ; vesicantia aut alia quæcumque emplastra fortiter irritantia thoraci et internæ brachii parti applicanda. Denique omnibus objectis, quæ sensus ægri excitent furoremque renovent, procul amotis, diligens cura hygenica adhibeatur necesse est. Æger ab omni inpressione infausta protegendus, consolandus, exhilarandus est, cum circumstantium amicorum aspectu et alloquio dulci, tum medentis ipsius vultu sereno suâque in arte fiduciam præferente, nec non agendi ratione salutis ejus prænuntiâ.

Hæc sunt quæ, in genere, de curandâ Rabie, eram dicturus.

FINIS.

Faculté de Médecine de Montpellier.



Professeurs.

MESSIEURS :

DUBRUEIL, Doyen.
BROUSSONNET, *examineur*.
LORDAT.
DELILE, *examineur*.
LALLEMAND,
CAIZERGUES,
DUPORTAL,

MESSIEURS :

DUGÉS,
DELMAS.
GOLFIN, *examineur*.
RIBES, PRÉSIDENT.
RECH.
SERRE, *suppléant*.
J.-E. BÉRARD.
RÈNÉ,

Agrégés en Exercice.

MESSIEURS :

VIGUIER, *examineur*.
KUHNHOLTZ, *examineur*.
BERTIN.
BROUSSONNET fils.
DUPAU.
TOUCHY.
DELMAS fils.
VAILHÉ.

MESSIEURS :

FUSTER.
BOURQUENOD.
FAGES.
BATIGNE, *suppléant*.
POURCHÉ,
BERTRAND.
POUZIN,
SAISSET,
ESTOR.

La Faculté de Médecine de Montpellier déclare que les opinions émises dans les Dissertations qui lui sont présentées, doivent être considérées comme propres à leurs auteurs, qu'elle n'entend leur donner aucune approbation ni improbation.